

四庫全書

子部

欽定四庫全書

子部

證治準繩卷八十八

詳校官太醫院吏目臣朱桂

編修臣倉聖脈覆勘

總校官進士臣朱鈐

校對官助教臣羅萬選

謄錄監生臣毛杞

欽定四庫全書

證治準繩卷八十八

明 王肯堂 撰

幼科

心臟門

蛆痘

袁天地間有形化者有氣化者形化者由於胎卵氣化者忽焉成形痘之有蛆形化氣化兼之也近有華峰道

人隱吳山治痘有一小兒患痘時屆十一月感發之候
痘經正順囊廓昂竦忽頭項上惡癢難忍手搔難禁遂
於潰破處將銀簪挑之則見其蟲如絲細而長有寸遂
以香油取盡花椒湯洗之癢即止愚按寒冬蟄令豈有
蟲乎茲迺氣化然也又有一患痘者時值炎熱之際頭
項上如前作癢予視之見其蟲如米粒囊中或二三盤
據焉此乃蠅蚋聚蓄膿血形化焉也先哲云蛆痘不死
以其梟毒盡發於外也

治痘瘡生蛆方 經霜桑葉 野薄荷 煎湯洗之其

蛆自去或先用艾條熏之後增紫蘇甘草煎湯洗之

禁雄黃礬石等藥

驗頭面論曰輕者頭面少又胡荽酒法不欲噴頭面以
諸陽之會在於頭心之華在於面痘為陽毒而心主之
故痘瘡頭面稠密者重頭面預腫者凶頭面瘡破爛腥
臭者凶欲占瘡之輕重吉凶莫如頭面也 人之一身
內則心為君主外則頭為元首病有真心痛真頭痛以

見不可輕犯也經曰頭者精明之府頭傾視深精神棄矣故占人之生死者亦莫如頭凡瘡初出從他處先見漸登於頭起發收靨皆然他皆有瘡而頭獨稀此佳兆也若於頭額之間先出先戴漿先乾收先破損其瘡稠密無縫肉下浮腫皮上濺起粗膚者皆凶惟瘡遍身俱收而頭上不收或熟自破或膿出結如堆積者不須怪蓋天地之化孤陽不生孤陰不長陽變陰合彼此相成頭者諸陽之會無陰相濟所以難收也又病閉目搖頭

者死此陽脈不治謂之心絕也 經曰十二經脈三百六十五絡其氣皆上走於面而走空竅又肝開竅於目肺開竅於鼻脾開竅於口心腎開竅於耳又修真家云面有七竅內應乎心又相術但觀人之面以知禍福可見面不可敗也凡瘡稠密七竅閉塞敗面者凶以臟腑經絡之氣皆病也又諸陽皆聚於面痘為陽毒初出之時必先於面然面有部位其候不同額屬心離火之位火性急烈不可輕犯凡瘡出現泡漿乾收先從額上起

者凶左頰屬肝震木之位右頰屬肺兌金之位二處不
論先後但瘡欲磊落堅厚若模糊成塊浮嫩易破潰爛
灌腫者凶蓋肝藏魂肺藏魄肝肺俱敗魂魄以離故凡
病兩腮冷或木硬者死頰屬腎坎水之位此處先出先
壯先靨者吉蓋瘡疹出於腎則吉入於腎則凶也鼻屬
脾坤土之位亦不論先後但不欲模糊早乾收也若未
成漿鼻頭先乾黃色凶此脾土將敗真臟色見也 薛
聞人氏云痘疹屬火證其面色赤者為順甚者為熱若

肝木尅制脾土致面色青者是為逆也急用四君升麻
柴胡調補脾胃色正纔治竊謂前證若傷食而嘔吐搐
搦脾氣受傷而瀉利搐搦或厥逆皆慢脾風之漸也用
人參理中湯泄利加柴胡鈎藤鈎治之或有少誤多致
不起若有痘毒內外鬱蒸發出遇風寒相搏凝滯於肌
肉遍身皮膚青色者用透肌散胃傷則生風嘔吐脾傷
則生風厥逆用五味異功散加天麻若瘡密熱盛便秘
飲冷面赤者用犀角解毒散灌漿之後發熱煩躁作渴

面赤者用當歸補血湯足熱腰痛目睛赤者地黃丸皆要法也 一小兒出痘飲冷過多腹痛面青手足並冷此寒邪傷脾而虛寒也用附子理中湯一劑而痛止用人參一兩薑一錢二劑而膿灌又用人參煎湯代茶與飲月餘而靨 一小兒出痘面色青手足冷此寒水侮土也非十二味異功散不能救不信乃服疎通之藥歿而遍身皆青

人中為陰陽之分故趙子昂以泰卦象之人中而上分

為三部人中而下亦分為三部髮際之上陽之上也兩眉之間陽之中也山根已下陽之下也自口至兩乳間陰之上也自心蔽骨至陰毛際陰之中也自陰而下陰之下也凡瘡之出現起發收靨自人中而分上下循序陰陽和暢雖多且密亦可言吉若或舛差雖是稀少亦可言凶此有伏也 發熱之時面色明瑩者吉面赤若塗硃者重此邪氣拂鬱於陽明胃與大腸也陽明經上循於面故赤也宜以清涼解毒之藥少通利之面垢慘

黯者凶瘡疹之火發自少陽面垢者少陽候見也鍼經云少陽病甚則面微壅宜表裏雙解蓋少陽從中治也驗耳目鼻經曰腎通竅於耳耳者腎之外候也腎之為臟水臟也天一生水受氣之初先生兩腎而一陰藏焉又有相火存乎命門之中瘡疹發熱耳獨涼者瘡疹為火腎不受邪存水之主以制陽光也如耳反熱則水不勝火將有歸腎之變痘瘡之候先觀耳後有紅縷者蓋手少陽三焦之脈從臚中上出缺盆繫耳後直上出耳

角紅者火色也此瘡疹之火發自少陽自見於其經也
凡瘡自耳先出未及成漿耳輪先靨者漸萌歸腎之勢
矣

目別見 經曰肺通竅於鼻瘡疹發熱之初噴嚏者火
邪上干於肺外應於鼻而瘡則嚏鼻乾黑燥者火形於
金金體本燥得火反甚急宜清金瀉火以解其毒鼻衄
者血得熱而妄行故衄出於鼻急與涼血瀉火以解其
毒鼻流清涕者疹也疹發於心心肺相連以火煉金熱

極而反化為水也瘡出之後鼻塞不通者熱也火主臌
脹瘡已成漿收靨之時鼻塞不得息者此鼻內有瘡膿
涕粘結可用金銀小簪子以通之如瘡未成漿鼻端先
乾者凶經曰臟真高於肺以行榮衛陰陽也邪火刑肺
肺敗不能輸精於皮毛故皮毛焦枯先見於鼻榮衛不
行陰陽不續以漸遍身皆乾枯而死矣凡瘡變壞鼻中
血出者涕自流出者鼻孔開張喘急者肺絕之候皆死
證也

驗唇口牙齒脾之竅通於口其華在唇四白脉訣曰應
唇通口氣瘡疹發熱之初口中和唇色紅潤者吉如口
燥唇裂其毒必甚急解之瘡出稠密唇口瘡子相粘諸
瘡未發此瘡先已戴漿諸瘡未收此瘡先已焦黑者凶
面瘡腫灌唇上瘡裂成塊乾澀者重如瘡出太密口中
臭氣者臟腑敗壞故臭出於口也瘡欲變壞唇上縮者
脾絕也唇下自呷者魚口也口中涎如膠粘者脾津竭
也皆不可治疹家唇口生瘡聲啞者狐惑證也不急治

之殺人

上片牙隸於坤土乃足陽明胃脉之貫絡也下片牙隸於乾金乃手陽明大腸脉之貫絡也瘡疹發熱之初口開前板齒燥者裏熱也宜以清涼之劑微解之咬牙者牙乃骨之餘腎主骨寒戰咬牙毒歸於腎必死如發熱咬牙者有欠則為肝熱有上竄則為心熱此欲作搐也瘡已收靨牙齦潰爛者此肉瘡未得平復也勿作走馬疳瘡治之疹後牙齦潰爛血出肉黑氣臭者此方是走

馬疳也

驗喉舌咽喉別見 舌者心之候脉訣曰外應舌將榮
又脾之脉絡於舌舌之在人延納飲食主持聲音其用
亦大矣瘡疹發熱其舌紅潤者吉舌燥如芒刺者裏熱
甚也急解之鍼經曰熱病口乾舌黑者死吐舌者脾有
熱也脾藏微熱則舌絡微緊時時舒舌勿用冷藥及下
之或飲水者醫疑為熱而下之誤也飲水者脾胃虛津
液少故耳瘡出之後舌上稠密出如堆粟破如蜂窠者

危更加飲水則瘡食物則噦聲啞不出者必死之證瘡
出太甚弄舌者凶

驗頸項經曰東風生於春病在肝俞在頸項頸項者生
氣之本也又曰天氣通於肺地氣通於嗑天食人以五
氣喉者氣之所由也故喉主天氣地食人以五味咽者
味之所由也故咽主地氣頸項者咽喉之管束也又三
陽之脈自頸而上三陰之脈自頸而還頸項者陰陽之
道路也瘡瘡之候頸項欲疎若纏項而出稠密太甚者

謂之鎖項廢其管束阻其道路上不得降下不得升內者不出外者不入經曰出入廢則神機化滅升降息則氣立孤危此死之徵也凡病深項軟者死骨敗也

驗胃腹經曰凡刺胸腹者必避五臟胸腹者臟腑之郭也又曰鬲育之上中有父母蓋言心肺也故痘瘡輕者胸前無胸腹出太甚者必重也其中於藏各有期日凡病深喘急胸骨扇動者肺焦脹也左乳下動脈突出者宗脈絕也皆不可治瘡疹腹痛者毒未盡也更宜詳審

驗手足四肢者諸陽之本瘡出欲疎其發欲透其靨欲齊如應出不出應發不發應收不收此脾胃氣虛不能旁達四肢也發熱手尋衣領亂捻物者肝熱也手搯眉目鼻口者肺熱也手足搖搦者心肝風火相搏也各隨其臟而瀉之足涼者此常候也瘡疹腎不受邪腎主足故足宜涼手足冷者脾臟怯也四肢皆稟氣於胃而不得至經必因於脾乃得稟也脾怯不能為胃行其津液故冷耳宜溫之瘡已出現手足多水泡者此肝勝脾衰

為鬼賊宜急治之不久便生癢塌也如遍身皆發手足
不透是空殼者此脾胃虛弱津液耗竭榮衛凝澀故其
毒亦鬱而不發也不能食者死能食者必發癰疽瘡勢
太甚手足冷者不治瘡未成漿手足皮脫者必死瘡已
正靨惟足不收者足為純陰無陽相濟所以收遲玉函
經曰孤陽寡陰即不中譬取鰓夫及寡婦如瘡始成漿
他處未收手足心先靨者其後必生怪疾也瘡靨之後
手足關節腫痛者必發癰也瘡癢手足搔亂者凶

驗寢卧夫衛氣者晝則行陽夜則行陰行陽則寤行陰則寐人之常也瘡疹發熱便昏睡者心主熱脾主困心受氣於脾故發熱昏睡此常候也起卧不時者內有熱也必多陷伏之變合面卧者裏熱也大抵瘡疹始終安寢者吉蓋氣血強盛榮衛流行邪出於表而不在裏則神安神安則志定是以得安寢也若氣血衰弱榮衛滯澀邪在於裏而熱心惡熱則神不安神不安則志不寧是以煩躁悶亂譫妄而不得眠也亦有毒伏於中神喪

氣脫僵卧如尸呼之不應飲食不知者不可以嗜卧論
乃死證也

驗飲食經曰人以水穀為本故人絕水穀則死仲景曰
水入於經其血乃成穀入於胃脉道乃行可見水穀之
悍氣為衛精氣為榮水去則榮散穀消則衛亡矣凡痘
瘡能食者雖重亦吉不能食者雖輕亦危也然有不能
食而生能食而死者何也蓋不能飲食者臟腑內實大
便不行有平日之穀氣以為之主瘡成之後自消穀氣

而思食矣其能飲食者邪熱殺穀即叔和所謂口乾饒飲水多食亦肌虛也將不久而變生焉惟疹家多不能食以口中不和不思食也

餘詳不能食門

痘後餘毒證治

萬凡痘瘡輕者其本疎其毒微其證順自然易靨無餘毒也重者其本密其毒盛其證險自難出難靨有餘毒也逆者或伏或倒陷或倒靨幸脾胃素強調治又早不

至大困亦作餘毒錢氏云其病有三一者疥二者癰三者目赤以證求之尚不止此亦有出已盡發已透靨已齊者復作餘毒此由溫補之過飲食之失而得之故治痘後餘毒或補或發散或解利要在分表裏論虛實不可一槩妄投湯劑也 海癩瘡餘毒或肝虛入眼目或肺虛為癬疥或為癰癤發在骨節腎之虛也發在肌肉脾之虛也或在筋或在頭或在面或牙齒疳蝕或咽喉腫痛各隨經而見皆毒不散蘊積而成或病人始不早

治或醫者失治遺於經絡其所由來蓋有自矣宜服解毒等劑

世痘毒攻脾則泄瀉身浮攻肝則眼生翳膜攻心則煩躁啼哭攻腎則耳疼聚膿攻肺則咳嗽痰涎

潔若已發後有餘毒未散復有身熱瘡腫之類當茶粉下解毒丸

丹治小兒痘瘡餘毒未散食穀太早補住毒氣 鼠粘

子六錢甘草五分犀角 白朮各三錢 荆芥 防風 枳

殼各一錢

水煎溫服

活血解毒湯 治餘毒 防風 荆芥 生地黃 赤

芍藥 當歸 連翹 牛蒡子 黃連 紫草

甘草 蒼朮 薄荷 川芎 木通 各等分水

煎服

癰癤此由毒氣留藏經絡故於肌肉虛處或關節動搖處紅腫而成癰又或既平之後失於解利餘毒大盛外不得洩於皮膚內不得入於臟腑聚而不去遂為之癰

而毒氣淺者止生結核腫毒瘡癤而已甚者至頭項胸脇手足肢節盡焮腫作痛但發一二處或根淺者可治若流注起伏根深蔓引者小則潰筋脫骨必為殘廢之疾甚則綿延日久而死 丹痘癘多是實毒血熱成癘分上下用藥一日不可緩成膿必用清熱涼血為主赤芍藥甘草節連翹桔梗之類上引用升麻葛根下引用檳榔牛膝更助以貝母忍冬草白芷瓜萋大便燥用大黃寒熱用芩槩此法累効 薛前證初起未成腫者用

活命飲隔蒜灸治而消之欲成膿者用活命飲解而潰

之氣血虛者八珍湯

虛羸

實而潰之虛而不能斂者托

裏散補而斂之大凡發熱腫痛大便不結用仙方活命

飲及隔蒜灸法大便秘結用仙方活命飲加大黃大便

已通腫痛未退再用活命飲一服用托裏散補其元氣

若發熱倦怠大便調和用補中益氣湯

虛熱

未應亦用

隔蒜灸若潰而發熱口乾肢體倦怠用東垣聖愈湯膿

水淋漓不時發熱用四君參耆若因乳母肝經血虛發

熱用加味小柴胡湯

發熱

肝脾鬱怒發熱用加味歸脾

湯

驚悸

膏梁厚味積熱用加味清胃散

齒

如專與涼

血用敗毒等藥復傷元氣必致成者不能潰潰者不能
斂矣 萬凡治痘癘先看何經絡分氣血多少用引
經藥如太陽經羌活防風陽明經升麻白芷少陽經柴
胡少陰經獨活太陰經防風厥陰柴胡若初紅腫硬痛
者以鍼刺之口吮去惡血以拔毒膏敷貼氣實能食大
便堅者用排毒散疎利之氣虛食少者用十宣散或流

氣飲毒淺而小者只內服小柴胡加生地黃湯外用拔毒膏貼之此治腫瘍之法也若已成膿而未潰者以鉞決去其膿勿使內潰已潰者用十全大補湯汗主之此治潰瘍之法也

仙方活命飲 治痘疔痘毒及一切瘡毒未成即消已成即潰此消毒敗膿止痛之聖藥 金銀花三錢陳皮

三錢皂角刺妙穿山甲用蛤粉炒乳香 沒藥 白芷

防風 當歸各一錢貝母 天花粉 甘草節各七分

右每服五錢酒煎嬰兒母同服為末酒調服亦可若
勢甚而邪在表者加麻黃散主之而毒在內者加大
黃下之當臨證制宜此解回生起死之劑但元氣脫
者不治

人參敗毒散 治餘毒癰腫 人參 赤茯苓 羌活

獨活 前胡 薄荷 柴胡 枳殼 川芎 桔

梗各等分 甘草減半 牛蒡子 防風 荆芥 連翹

金銀花 即荆防敗毒散 頭上加白芷升麻 上身倍加

桔梗 手加薄桂 腰加杜仲 腿足加牛膝木瓜

樺皮散 治痘瘡及乳癰并一切腫毒 樺皮木剉煎

溫服此藥味苦平無毒 若治乳癰取樺皮燒存性
為末酒調服之立消

十三味敗毒散 治癰毒 當歸 白芷 穿山甲 土

妙金銀花 防風 乳香製 甘草 陳皮 赤芍

藥 皂角刺 貝母 沒藥 天花粉 芍藥

各等分酒水各半煎服

排毒散 見收厲

保命集木香散 治小兒癩後生瘡如神 地骨皮一

兩 木瓜 半兩

穿山甲 炙黃三

錢半

麝香一

右為末

米飲下二錢

流氣飲 川芎 當歸稍 白芍藥 防風 人參

紫蘇葉 木香 桂心 桔梗 雞心檳榔 白

芷 厚朴 烏藥 枳殼 甘草節 黃耆

分

各四分

各四分

右剉細水一盞煎七分服氣血虛而自利者加熟附
子大便實加大黃

小柴胡加生地黄湯

柴胡

人參

黃芩

各三兩

甘草

炙生地黄

半夏

各二兩湯泡七次

右為麤末每服三

錢水一盞生薑三片棗一枚煎至半盞去渣溫服

六味活血散

治癰疽瘡痛初起紅腫不散

當歸

川芎

赤芍藥

生地黄

紅花

蘇木

各等分

右水煎量服之

五福化毒丹 治痘毒實熱腫痛 生地黃 熟地黃

天門冬 去心 麥門冬 去心 玄參 各二兩 甘草 甜硝

各三兩 青黛 一兩五錢

右為末密丸芡實大每服一丸白湯化下

犀角消毒丸 治痘疹餘毒一切瘡毒 生地黃

荊芥 當歸 犀角 屑 防風 牛蒡子 杵炒 赤芍

藥 連翹 桔梗 各七錢 薄荷 黃芩 甘草

右為末密丸芡實大每服一丸白湯化下

按化毒丹降火涼血解毒寒中之劑消毒丸清熱解毒破血之劑蓋小兒臟腑脆嫩元氣易傷况痘後氣血皆虛豈能勝當此劑若胃氣一傷則未成者不能消散已成者不能腐潰已潰者不能生肌殊不知痘瘡乃臟腑所發遍身之血皆化為膿况此方愈而患此乃脾胃虛怯肌肉消弱榮衛短濇所致治者審之

十宣散

見形

托裏散 治痘毒元氣虛弱不能潰散未成用之自消

已成用之自潰

人參

黃耆

炒各二錢

當歸

酒洗

白朮

陳皮

熟地黃

茯苓

芍藥

炒各一錢五分

甘草

炙五分

右三五錢水煎服

托裏消毒散

治痘毒氣血虛弱不起發腐潰收斂或

發寒熱肌肉不生

人參

黃耆

當歸

酒洗

川芎

芍藥

炒

白朮

陳皮

茯苓

各一錢

金銀花

連翹

白芷

各七分

甘草

五分

右每服三五錢水煎

東垣聖愈湯 治膿瀆心煩無寐體倦少食 熟地黄

自製者佳 生地黄 各二分 人參 川芎 各三分 當歸 黃耆

各五分 右水煎服

濟生歸脾湯 治脾血虛損健忘驚悸或心氣虛不能

攝血歸源以致妄行或吐血下血或因乳母心脾二

經有熱瘡不結痂或瘡痕赤色加柴胡山梔即加味

歸脾湯

人參 白茯苓 黃耆 白朮 龍眼肉 當歸

遠志

酸棗仁

炒各二錢

木香

一錢甘草

五分當歸身

一錢

右薑棗水煎母子同服

丹溪痘癘敷藥用貝母南星殭蠶天花粉寒水石白芷

草烏大黃豬牙皂角醋調敷患處効

拔毒膏

一名必勝膏

馬齒莧

杵汁

豬膏脂

石密

右以三味共熬為

膏塗腫處

神効隔蒜灸法

治痘癘大痛或麻木痛者灸至不痛

不痛者灸至痛其毒隨火散用大蒜頭切三分厚安上用小艾炷於蒜上灸之每五壯易蒜再灸痛不止尤宜多灸小兒須將蒜切片著肉一面略剝小空灼艾燃蒜先置大人臂上試其冷熱得宜然後著瘡上又別灼如前法試之以待相易勿令歇

替鍼丸 治痘瘡膿已成不潰 陳壞米 一錢 礪砂 五

錢 雄雀糞 四十九粒真雄雀糞直者是也 右為末米粥丸如麥

粒大每用一粒粘瘡頭上以膏藥貼之半晌其膿自

出若瘡頭透而膿不出或出而愈痛或發熱血氣虛
也用托裏散或作嘔吐痰食少體倦脾氣虛也用六

君子湯

神效太乙膏 治一切瘡疽潰爛

玄參 白芷 當歸 肉桂 赤芍藥 大黃

生地黃 各一兩

右咬咀用麻油肆拾兩入銅鍋內煎至藥黑濾去渣
徐入淨黃丹一觔再煎滴水成珠 軟硬得中即成

膏矣

神效當歸膏

治痘毒浸淫或湯火等證及瘡腐不能

生肌收斂者

當歸 黃蠟

生地黄

各一兩 麻油 六兩

先將當歸地黄入油煎去渣入蠟融化候溫攪勻即成膏矣

豆豉餅

治瘡瘍腫痛或硬而不潰及潰而不斂并一

切頑瘡毒癩用江西豆豉為末唾津和成餅大如銅

錢厚如三四錢置患處以艾鋪餅上製之未成即消
已成者祛逐餘毒間有不効者乃氣血虛敗之證參
疔瘡論製法用之

如聖餅 治一切瘡瘍硬腫不能消散或毒不能解散

乳香 沒藥 木香 血竭 當歸各等分 麝香少許

右各另為末酒糊和為餅製熟頻尉患處惡瘡加蟾
酥等分

神効散 治瘡瘍初起腫痛者用之可消加血竭更効

黃檗

炒為末
二錢

草烏

生為末
二錢

右用漱口水調敷常

以漱水潤之

三豆丸

痘後癘毒初起紅腫

黑豆

赤豆

菘豆

用醋浸研漿時時以鷲翎

刷上隨手可消

鐵籜散

治痘後癘毒

鳳凰退燒灰醋調圍四畔留

頭出毒氣甚佳

瘡疥痘後遍身痘癬如疥如癩膿血浸淫皮膚潰爛日

久不愈此毒氣彌漫散於皮膚宜升麻葛根湯初熱防

風解毒湯大法苦參丸痘癩主之若因搗搯成瘡者只

以百花膏收靨塗之

連翹散 治小兒瘡疹癩痘疹餘毒作楚或生於頭面

耳疼頰赤生瘡 連翹 黃芩 瞿麥 木通 滑

石 柴胡 荆芥 牛蒡子 防風 羌活 赤

芍藥 甘草各等分

每服三錢水一盞煎半盞又入生薄荷尤好

金花散

見潰爛

疔蝕痘後疔蝕瘡者毒壅肌肉內透筋骨外連皮膚時痛出血日久不痊亦惡候也內服十全大補湯汗外以

綿蠶散貼之收靨

更與收靨門疔蝕條參看

三黃散 治疔熱生瘡膿水浸淫膿流處便潰爛

松香 五倍子 黃連 黃丹 海螵蛸

錢各一

輕粉 雄黃

錢各四

右為末用瀝肌散煎洗滲之

乾者香油傳

癩疹癩者皮膚間隱隱成疔瘡瘙癢爬搔更多內服鮮
毒防風湯大法外以篦衣湯洗之 疹者皮間點點狀
如蚊蚤所咬之迹或如小芥子即麻子也升麻葛根湯
初熱加防風荆芥穗主之熱甚渴者與人參白虎湯相
合服之

篦衣湯 炊飯篦衣煮水洗癩起疔瘡者神效如無以
炊篦煮湯亦可

蜺子水 治痘後發癩

蜺子不拘多少活者以水養五七日旋取其水洗之
丹瘤赤火丹瘤之惡候也流移紅腫其痛手不可近從
頭上起者過心即死從足下起者過腎即死宜內服小
柴胡加生地黄湯玄參化毒湯外用蜺鍼法吮去惡血
自消 若但紅不腫不痛者癍也人參白虎湯加玄參
大青生地黄主之

玄參化毒湯 玄參 當歸尾 赤芍藥 石膏 連

翹 生地黄 地骨皮 紅花 荆芥穗
洗酒防風

淡竹葉 木通 右水煎服

犀角消毒散 治癰疹丹毒發熱痛癢及瘡疹等證

牛蒡子 甘草 荆芥 防風 犀角 金

銀花 三分 右水煎熟入犀角傾出服

加味解毒散 治癰疹癢痛寒熱甚者煩躁譫語并痘

毒發熱咽乾

犀角 連翹 牛蒡子 薄荷 甘草

五錢 右為末每服一二錢滾湯調下

小柴胡加生地黃湯

見前癘癩

螞蟻法 取水蛭大者五六條放腫處吮去惡血可以

消丹瘤決癰腫

眼目萬痘瘡毒氣之為目翳也蓋自臟而達外治之之法但活血解毒而已活血不至於熱解毒不至於冷五臟平和則翳當自去不可輕用點藥反至損睛宜蟬蛻散

痘眼

四物湯加柴胡主之

若目閉淚出不敢見明

者此羞明證也惟於黑暗處則能開纔見明則陽光爍

之淚自澀出癰澀難開宜洗肝明目散

痘眼目

便秘者瀉

清丸肝或能開目只視物昏者此血不足也四物湯加

蜜蒙花目中赤者洗肝明目散主之從子懋錕痘後

兩目生翳羞明特甚時余與家兄從宜興試歸視之則

窻牖帷幙皆以衣被重重覆蔽就明展兩睥白膜已遍

覆黑睛淚如湧泉嬰科眼科投藥不効束手告技窮矣

余亦莫知為計家兄曰女弟垂死之證弟能生之豈遂

技窮於是試精思之余返書室閉戶而思目者清陽之

所走也而忽焉有翳膜是濁陰犯之也濁陰烏敢與陽
光敵故羞明特甚爾吾得治法矣乃以黃耆助清陽之
氣為君生地黃當歸養目中真血為臣羌活獨活防風
白芷川芎甘菊花薄荷荆芥升清陽黃芩豬膽汁車前
子茯苓降濁陰為佐雄豬肝作引煎服仍間服瀉清丸
八劑而目開徹幃膜翳已去矣時眼科所進點洗之藥
一切屏不用只用橄欖核磨汁敷眼胞而已蓋嬰兒柔
脆點洗之藥必有所傷故也 治法方論詳大科眼目

門并本門眼目條內

涼肝明目散 治後羞明 當歸 龍膽草 蜜蒙花

川芎 柴胡 防風 酒連 各等分雄豬肝煮

湯煎服

望月沙散 痘後暗室中不能開者

穀精草 蜜蒙花 酒洗 蟬蛻 去翅足 望月沙 一兩

右為末雄豬肝一兩竹刀批破用藥一錢摻入肝內

水煮熟飲汁食肝効

羌菊散 治痘疹後毒氣不散生翳障及暴赤眼 羌

活

蟬退

去土

防風

蛇退

菊花

穀精草

木

賊

甘草

梔子

白蒺藜

大黃

黃連

各少許

右為末每一錢米湯泔水溫服

便秘痘後毒入腹中熱氣併於小腸則小便不通併於
大腸則大便不通如前後部俱不通者熱勢愈甚小便
不通者五苓散驚導赤散心大便不通者三黃丸四順
飲並發熱三乙承氣湯大小便俱不通者八正散通關散

並痘斟酌用之
便闕

泄瀉痘後泄瀉其證有二 如能食而渴脈盛者此熱

入大腸也渴者內熱也食能多者熱消穀也脈盛而數

熱證諦也宜黃芩湯

痘泄利

加黃連

如食少不渴脈微

少者此裏氣虛不能禁固水穀也宜四君子湯加訶子

肉豆蔻或理中湯丸加熟附子甚者以肉豆蔻丸止之

俱痘泄利

便膿血痘後便膿血者此熱毒入大腸也宜四物湯失血

加黃芩黃連枳殼荊芥穗或黃連解毒湯

煩躁

加生地黃

勿作倒靨及用劫澀藥也

嘔吐胃主納而不出大小腸主出而不納痘後嘔吐者是餘毒在胃也然有冷熱二證如心煩作渴食乳甚急聚滿胸中然後吐出如射其人面色帶赤手足心熱居處喜冷此熱吐也橘皮湯

痘吐逆

加黃連竹茹主之

如乳食水漿隨吐面色青白手足冷大小便自利此冷吐也益黃散

脾

主之

痘後餘毒多是熱邪其間冷證

十有一二也 亦有傷食而嘔者但聞食臭即吐不欲食木香大安丸或養脾丸並用生薑湯下 有飲水多而吐者必吐清水名水逆五苓散主之

木香大安丸 木香 二錢 黃連 陳皮 白朮 各三錢 枳

實 山查肉 萊菔子 炒 連翹 神麴 炒 麥蘖 炒

砂仁 各一錢五分 右為末神麴糊為丸陳廩米湯下

養脾丸 人參 白朮 當歸 川芎 各一錢五分 木香

青皮 黃連 陳皮 各一錢 砂仁 山查肉 神麴

炒麥芽炒各五分

右為細末水調神麴糊丸如麻子大每服三五十丸

陳倉米飲下

發熱痘瘡自初以來一向發熱至於差後猶不少減者此有虛實二證如大便難小便赤能食而煩渴者此

實熱也以三黃丸或四順飲並發熱先解利裏熱後用升

麻葛根湯初熱加地骨皮解表熱也蓋升麻葛根湯治

瘡疹未發之先已發之後身熱藥也如大便不秘小

便不赤坐立振搖飲食不甚進者此虛熱也以保元湯
大法加知母麥門冬虛甚者加炒乾薑或熟附子少許
引火歸源

薛陳文宿先生云痘瘡收靨之後渾身經日不除別無
他證用柴胡麥門冬散如不退服人參白朮散痘渴若
風熱咳嗽咽喉不利用桔梗甘草防風湯竊謂前證有
因熱毒未解者有因胃氣虛熱者有因胃氣實熱者其
因不能枚舉當臨證制宜而藥之 一小兒咽痛壯熱

痘痕色赤手微熱此餘毒未解用柴胡麥門冬散而安
七日之後復熱手指初捏似熱久捏則冷此脾氣虛也
用五味異功散而痊 一小兒痘咽痛大便不實口渴
飲湯手足不熱此脾胃虛弱也用人參白朮散而大便
實但不時寒熱用加味逍遙散而愈 一小兒痘咽痛
發熱作渴面赤飲冷此胃經實熱也用射干鼠粘子湯
而愈因食厚味復發手足並熱用瀉黃散一劑而痊
一小兒痘咽痛發熱飲冷大便黃色手足指熱此脾胃

實熱也用瀉黃清胃二散各一劑而愈後因乳母食厚
味兒口角流涎不能吮乳仍用前藥治母而愈 一小
兒痘咽痛足熱余謂此稟足三陰虛而無根之火上炎
也古人有云痘歸腎經必不可救當用壯水之劑亦有
生者奈彼不悟翌日果腰痛咽啞始信余言乃用大劑
地黃丸料加五味子并補中益氣湯而愈 一男子出
痘上體甚熱兩足俱冷喉痛作渴瘡亦不起發此稟腎
經虛熱也以六味地黃丸料煎與恣飲漸愈又用八珍

湯而痊 一小兒面色素白出痘咽痛發熱面赤作渴
飲湯手足指冷此稟足三陰虛也用大劑加減八味丸
料煎與恣飲又以益氣湯助其脾肺以滋化源痛止熱
退而愈

柴胡麥門冬散

痘發熱

柴胡梔子散 治肝膽經有熱瘡毒不愈或發熱不止

柴胡 山梔 牡丹皮 川芎 芍藥 茯苓

各一錢

各七分 白朮 炒 甘草 各五分 當歸 牛蒡子 炒 各七分

右水煎母子同服

小柴胡湯

治發熱甚而嘔者宜服之

柴胡

人參

黃芩

各三兩

甘草

炙

半夏

各二兩

湯泡七次

錢

右為麤末

每服三錢水一盞生薑三片棗子一枚同煎至半盞

去滓溫服咳嗽者加五味子煎服頭痛發熱肢節疼

痛者四味升麻湯大便不通者四順飲若大便自利

黃黑色者此毒亦有所出不必廣與湯劑恐重增他

病大便自然通不得以溫藥助之瘡疹亦稀少自快

利只與四味升麻湯荊芥散雖大便利不可以溫藥助之其下利甚者却與少溫之

槐花散

治癩瘡餘毒不退

槐花

赤小豆

各炒
二錢麩

香少許

右為細末每服五分蜜湯調服不拘時候

黃耆散

治壯熱不退可涼肌膚散熱

黃耆

柴胡

乾葛

甘草

炙各
等

右為末每服一錢薄荷三葉

水半盞煎至三分約三呷空心服此藥治發熱數日

未退者其熱是瘡疹者量其虛實用之也

中風痘後忽然口噤涎潮角弓反張手足瘳癱身青黑色此中風也瘡痘方愈榮衛正弱不知避忌忽遇節令氣交八方不正之氣乘虛而入故為此證宜消風散二錢入蟬蛻末一錢分為三服投生薑薄荷汁及酒各數點溫湯浸之連二三服或作癰疹或再出膚疹而愈

消風散

見痘中風

鈎藤湯

痘後口噤僵直遶臍腹痛

鈎藤 紅花 木香 川芎 當歸 白芍

甘草 白朮 青皮 黃連 官桂 生薑

各等分水煎不拘時服

骨節作痛俗名痘風丹溪分氣血虛實以日子守之多
帶氣血不足 虛則黃耆生血之劑助之略佐以風藥
實則白芍藥黃芩為君連翹白芷續斷之類為佐

若屬虛寒陳氏方可用 餘詳痘中風門

拘攣痘後手足拘攣屈伸不便起居艱苦者乃血耗氣

虛不能榮養於筋宜十全大補湯去地黃白茯苓加川
續斷多服乃佳氣虛者少加川烏炮過行經不可誤作
風治妄行發散反耗陰血也

當歸桂枝湯 治痘後手足不能屈伸 當歸 川芎

黃耆 甘草 薄荷 黃檗 蒼朮 炒各等分 水煎

如氣虛少加川烏以行經加人參為主 如感風寒
以致骨節疼痛加羌活防風

昏昧妄言痘後昏昧不辨識人口中常妄言如邪祟狀

此移熱入心包絡宜導赤散

心吞安神丸

痘謔

待醒後

以保元湯加麥門冬生地黃四物湯加石菖蒲木通山
梔子仁相間服之 若卒然昏昏喜睡狀如眩暈身無
熱口中無妄語其人痘出必重又乳食少今毒氣已解
正氣未復故邪退而喜睡乃否極泰來之象不須妄治
逡巡甦醒矣

厥逆手足厥冷蓋覆不溫此痘疹逆候也若在正盛之
時十無一生今病已愈氣血久虛脾胃大困其厥逆宜

矣用保元湯加當歸身熟附子主之

咳嗽咳嗽頻頻涕唾稠粘此痘疹常證也有寒有熱有

虛有實不可拘泥一定之法如自初出咳嗽到今未

愈者此肺中餘邪未盡也宜甘桔湯咽合瀉白散肺加

牛蒡子馬兜鈴主之如咳而熱大便難小便赤者此

熱毒也宜葶藶丸主之喘大便潤者人參白虎湯痘

合甘桔湯主之如咳而大便溏小便清無大熱渴者

此虛也宜人參清膈散主之嗽如咳而血出者甘

桔湯加牛蒡子茅根汁阿膠主之 如向不咳今始咳

者此風寒外感也麻黃湯主之

喘痘

燈心湯 治瘡痘出後煩喘小便不利者宜進之

燈心 一把
鼈甲 醋煮黃

二兩

右判為散每用一兩用水八合煎取四分服之各量

大小加減

咳嗽之時脇痛者經云左右者陰陽之道路左右兩脇之謂也由餘毒在中陰陽之氣不能升降故脇為之疼

也但當解毒毒氣去則真氣行所苦自平矣小柴胡加枳桔湯主之

赤茯苓湯 治小兒疹痘瘡出後咳逆脇痛不下食

赤茯苓

甘草

炙

大青

升麻

枳殼

麩炒各半兩

梔

子一分

右為麤末每服一錢水一小盞入苦竹葉七片豆豉三十粒同煎至五分盞去滓分為三服日三四服看兒大小以意加減本方稱疹痘出後脇痛者由病後

毒氣溷亂阻於升降左右為陰陽之道路氣之所行
處令氣滯為脇痛以枳殼寬腸下氣令氣順脇不痛
也大青梔子去蘊熱升麻解毒赤茯苓導心火利小
腸無熱以克肺氣而咳逆自平爾

腹痛瘡疹未出而腹痛者乃癩毒內攻也今毒已解無
復壅遏矣而腹中痛者其證有二 一則因大便未通

燥屎作痛備急丸主之

大便閉

一則因食過多胃虛不

能消穀而作痛如便秘者丁香脾積丸

傷食

便利者木

香大安丸

傷食

主之

但燥屎痛者病在下焦傷食痛

者病在上焦手不可按若原食少又便常潤忽爾作痛者此虛寒證也病在中焦必喜用手按摩黃耆建中湯主之

渴痘家作渴亦是常事至痘後則不宜有渴乃忽然渴而引飲者餘毒留於心胃膈焦咽燥故也其人必能食大便秘小便赤舌燥咽乾宜人參白虎湯加黃連主之若食少大小便自調雖好飲湯咽舌不燥此脾胃虛

津液不足也宜人參白朮散不愈人參麥門冬散加天

花粉主之

並痘渴

失音痘後失音有二 咽痛不能言者此毒氣結於咽

喉之間痰壅作痛而不能言天花散主之

痘失音

心熱

不能言者心中邪熱未徹腎虛不能上接於陽雖有聲而不能言四物湯去川芎加麥門冬白茯苓主之

不喜食痘後邪氣盡退正氣將復脾胃略紓宜漸能食也若原不食今因喜食太過或原能食今又驟加以致

惡食不食者此皆內傷有餘證也宜木香大安丸主之
傷食

如向未食今又不喜食者此脾胃中氣不足宜

七珍散

痘不能食

或人參白朮散去葛根加陳皮木香

研末取二兩另用糯米菘豆各二兩各炒熟研末相合
棗湯調服稍能食更兼進養脾丸

寒熱痘後忽發寒熱如瘧狀至後如期即發者此脾虛
氣弱失於將息重感風寒宜先以柴葛桂枝湯發去新
受表邪後以保元湯加當歸陳皮白朮砂仁烏梅生薑

調之

大和散 治瘡痘後寒熱往來嗜卧頓悶躁亂

生地黃 當歸 地骨皮 人參 甘草 炙

白芍藥

右以咀每服一錢水半盞煎至三分去渣溫服

柴葛桂枝湯 見初熱

腫脹痘後面目虛浮或久則一身皆腫者此表氣不足
出風太早風邪乘虛而入其治在肺宜五皮湯先加桂

枝微汗之後只服本方若遍身皆腫以胃苓湯合五皮湯主之

痘後腹虛腫脹滿或氣喘麤者此宿垢在裏不問餘毒食積畜水並先利之宜塌氣丸利後以胃苓湯去甘草加人參黃耆大腹皮調之其治在脾如因新食作脹不腫者只木香大安丸

五皮湯 桑白皮 地骨皮 生薑皮 大腹皮

五加皮 各等分

右剉細取長流水一盞燈心十二莖煎七分溫服

塌氣丸

木香

半兩

雞心檳榔

一雙

黑牽牛

二兩半生半炒取頭

末一兩

共為末神麩糊為丸如黍米大薑湯下

胃苓湯

豬苓

澤瀉

白朮

白茯苓

蒼朮

厚

朴

紫油者薑汁炒

陳皮

桂心

甘草

右剉細水一盞

煎七分去渣溫服無時

自汗盜汗痘後自汗盜汗皆衛氣弱榮血熱肌肉虛也

宜保元湯

大法

當歸六黃湯相間並調敗蒲散服之如

汗出盛再用溫粉撲之

方並見自汗條

若渾身如水髮潤如油

汗出如珠者皆亡陽證死不治

失血痘後失血證乃餘毒邪熱迫血妄行也

自鼻出

者玄參地黃湯主之

失血

外用梔子炒焦黑研末吹之

自溺出者八正散主之

小便不利

自大便出者梔仁承

氣湯主之

此與上自汗證同為熱也上是熱在衛故

汗出此是熱在榮故血出二證大便秘者並與四順清

涼散主之 發熱

桃仁承氣湯

桃仁

二十一箇去皮
尖研泥勿煎

大黃

二錢

官桂

紅

花 各一錢 甘草 五分

右三味剉細水一盞煎七分

去查入桃仁泥化服食前服

吐利虻瘡後或吐虻或利下虻者皆熱毒入裏也熱在

胃則吐虻熱在腸則利下虻利者黃芩湯

泄利

加桃仁

艾葉吐者黃芩半夏湯

吐利

加烏梅川椒若不吐利但聞

食即吐虻者此胃久虛蟲無所食故聞食臭即吐食已

易饑宜理中湯丸吐利加烏梅肉黃連川椒主之袁
氏治痘屎蟲歌曰痘裏屎蟲胃氣離人參白朮與陳皮
茯苓甘草當歸併煎來連服自蟲除

蓮肉湯

蓮肉

去心
半斤 豬肉
一斤 去油皮

共水煮熟下砂仁伏醬朝夕與啖其胃氣接養蟲自
安居不出矣切勿宜投以史君子檳榔之物痘中一
投命遂喪矣

狐惑痘後吐虵而手足厥冷者虵厥若不吐利內蝕臟

黃連陰蠱丸

治狐惑瘡

黃連 二錢

蘆薈

乾蟾 各

一錢二分

史君子肉

二錢五分

蕪荑

一錢五分

川楝子肉

一錢

右末烏梅洗淨去核搗膏和丸米飲下

牙疳痘後牙齒齦肉潰爛者此痘疔脫去涎水浸漬為

疔蝕瘡用綿鹽散

收靨

傳之

若氣臭血出者又名走

馬疔瘡內以黃連解毒湯

煩躁

加雄黃為丸竹葉湯下

外以馬鳴散傳之

或口舌生瘡者並宜洗心散

已

上諸證大便秘者並用四順飲利之大便潤者用甘露

飲服之老茶葉薤葉根煎湯洗以白礬即酸梅也燒灰
人中白火煨加入雄黃散傳之

洗心散 當歸 生地黃 木通 黃連 麻黃 大

黃酒洗薄荷葉各等分 右剉細水一盞加燈心為

引煎七分去渣溫服

甘露飲 牙疳暫用 麥門冬去心一錢 天門冬去心二錢 生地

黃四分 熟地黃六分 石斛去根 枇杷葉各五分 山茵

陳 枳殼 黃芩 犀角屑各六分 甘草 一字

水煎服

雄黃散

雄黃

枯礬

各一錢

麝香

一分半

人中白

五分

右為末吹入鼻中如吹不入用麻油潤使進

馬鳴散

人中白

即溺缸底白堊以物刮取用新瓦盛之火煨過如白鹽乃佳半兩

馬

鳴退

即蠶退紙也燒過二錢五分

五倍子

生一錢另用一錢同礬枯

白礬

一錢

搥碎另取五倍子一錢入礬於內用火煨枯

共為極細末先以米泔濃汁浸洗以此傳之

人中白散

人中白

煨一兩

黃礬

炒黑三錢

右為末搽口內

吹口散 治口疳 黃連 青黛 孩兒茶 冰片

為末吹之

赴筵散 口瘡神效 薄荷 黃檗 等分為末入青

黛少許搽之

牙疳方 痘後餘毒攻牙齦疳腐 內宜服甘露飲

人中白 煨三錢 枯礬 二錢 鹽梅 七箇煨存性 麝香 一分 白礬子

灰 一錢 五穀蟲 焙乾二錢 為細末先將蔥茶洗去腐肉

須見鮮血然後搽藥

大抵瘡痘之後遇有便秘內熱等證須當解利勿使餘

毒變生諸證也解利之劑如三黃丸四順飲

並見發熱之類

若失於解利致生諸證須當用切中病源之藥以急治之不可緩治令病勢滋蔓反害人也今人不能究其病因一槩用不急之藥其意但欲逃差謬爾何嘗實能究其致病之由而藥之即急治之中惟在識其虛實苟稟受既實榮衛充壯病後有熱者即與解利緩治不可也所稟怯弱病後榮衛大虛坐立振搖飲食少者却宜和

緩之藥以扶持之候其飲食如故榮衛既充然後微微解利未為遲晚或至虛之人不必解利可也

水痘

小兒痘瘡有正痘與水痘之不同新安張季明云其瘡皮不薄如赤根白頭漸漸赤腫而有膿差遲者謂之大痘此裏證發於臟也其瘡皮薄如水泡破即易乾而出無漸次白色或淡紅泠泠有水漿者謂之水痘此表證發於腑也亦與疹子同又輕於疹發熱一二日而出

而即消易出易靨不宜燥温但用輕劑解之麥湯散主
之羌活散消毒飲麥煎散俱可服又當服大連翹湯以
解之 如心悶煩躁發熱及大小便澀口舌生瘡者通
關散主之 水痘夾黑出來黑水流或手足冷者前胡
甘草生地玄參連翹茯苓木通蟬蛻麥門冬川芎陳皮
當歸生薑水煎服

麥湯散

治水痘

地骨皮

滑石

甘草

各五分

甜葶

麤

麻黃

大黃

知母

羌活

人參

各一錢

右剉散水一盞每服二三錢小麥七粒煎六分不拘
時溫服分二貼

麥煎散 治小兒夾驚傷寒吐逆壯熱表裏不解氣麤
喘急面赤自汗或狂語驚叫或不語無汗及癰疹遍
身赤癢或來潮熱時行痲痘疹子餘毒未盡渾身浮
腫痰涎咳嗽或變急慢驚風手足搐搦眼目上視及
傷風頭疼並治之

滑石 地骨皮 赤芍藥 石膏 白茯苓 杏

仁 知母 甘草 葶藶子 炒人參 麻黃 一兩

半

右為末每服一錢麥子煎湯下如初生芽兒感冒風冷鼻塞身熱噴嚏多啼每一字用麥子煎湯調下一

方去地骨皮滑石加羌活川芎薄荷煎湯調下

羌活散

初熱

消毒飲

即牛蒡荆芥甘草三味

大連翹湯

便悶

通關散

便悶

按水痘今小兒患之者大率無害如無內證不必服藥無事生事也前後四方不為輕劑非熱甚不解二

便秘澀煩悶不寧不宜輕服

麻疹

麻疹浮小而有頭粒隨出即收不結膿疱北人謂之糠
瘡南人謂之麩瘡吳人謂之痧越人謂之瘡古所謂麻
間人氏所謂膚疹是也與前所謂脾為疹者不同小兒
有出一二次者出輕而日數少者名奶疹子出稍重而
日數稍多者名正疹子又出於痘前者名奶疹子出於
痘後者名正疹子初出亦與痘瘡相似但痘發於臟麻

發於腑臟屬陰其病本深故難出難收而藥於溫平為
宜腑屬陽其病本淺故易出易收而藥於清涼為宜
萬氏云痘大而焮腫者少陽三焦火也陽道常饒故大
而腫疹小而碎者少陰心火也陰道常乏故小而密三
焦水穀之道路脾胃主納水穀治痘專以脾胃為主心
肺屬陽而位乎上心火旺則肺受之治疹專以肺為主
觀其咳嗽者火炎則肺葉焦舉也鼻流清涕者鼻為肺
之竅以火爍金而液自流也目中淚出肺熱則移於肝

肝之竅在目也或手搥眉目唇鼻及面者肺熱證也
按既是心火刑肺金即是賊邪其證當重何反輕於痘
余每治麻疹但據見證以瀉白散加減大劑投之即至
危困之證無不愈者其他時師用苦寒降火辛溫發表
而沾於危亡者不可勝數安在其為心火刑肺也 春
溫夏暑秋清冬寒此四時之正氣也冬應寒而反溫陽
氣暴泄火令早行人感之者至於來春必發瘡疥未出
痘疹者必感而出即曰胎毒未有不由天行者故一時

傳染大小相似但見疹痘之出即宜先服三豆湯代天

宣化丸

二方俱見前預防

以預解之

麻疹初出全類傷風發

熱咳嗽鼻塞面腫涕唾稠粘全是肺經之證有未傳泄利者有一起即兼泄利者肺與大腸相表裏表裏俱病也惟不可觸冒風寒及於正蒸熱時噉食能變輕為重不可不慎 麻疹形證亦同有如發風癩疔瘡壅起如雲頭色赤成疔隨見隨沒者有如粟米頭抗三番俱見而不沒至三日後方收漸沒者然皆謂之麻疹其於欲

出未出之際當用發表之藥發之則易出易愈也 麻
疹有發熱至十餘日始見者大抵主在發散肺經之熱
毒者始事也調理補養病後之元氣者終事也其間或
兼風或兼痰或傷食並隨宜加對證之藥其有變證即
隨病用對證之藥要不亂投湯劑則見無事矣 疹喜
清涼痘喜溫煖此法人皆知之然疹子初出亦須和煖
則易出所以發苗之初只要發出得盡則毒便解非若
痘必苗而秀秀而實而後毒解也痘子成實之時若大

溫熱則反潰爛不收是痘之後亦喜清涼也故治痘疹者無過熱無過寒溫涼適宜陰陽自和是為得之

初熱痘疹發熱之初多似傷寒惟麻疹則咳嗽噴嚏鼻流清涕眼胞腫其淚汪汪面浮腮赤或嘔惡或泄利或手搯眉目鼻面此為異耳輕者以瀉白散合三味消毒散主之重者以金沸草散主之兼泄利者合升麻葛根湯以白芷代葛根此余創立治法用之無不效者即十分危證守而勿失終於必濟每見諸書所定方類皆苦

寒辛涼發表之劑不盡對證對經恐有誅罰無過之失
用者詳之 大抵疹欲出已出之際雖寒勿用桂枝雖
虛勿用參朮雖嘔而有痰勿用半夏南星 大忌認作
傷寒妄汗妄下汗之則增其熱為鼻衄為欬血為口瘡
咽痛為目赤痛為煩躁為大小便不通下之則虛其裏
為滑泄為滯下多至不救慎之慎之 萬如手足稍微
冷惡寒而無汗面色清慘而不舒左額有青紋者傷寒
之熱也手足稍微溫發熱有汗面赤而光者傷風之熱

也並宜惺惺散痘初熱發散之目胞腫而右頰有青筋發

熱而頭額腹肚最甚或兼嘔吐腹疼者傷食之熱也備

急丸痘初熱下之面色青紅額正中有紋手掌心有汗時

作驚惕手絡脉微動而發熱者此驚熱也瀉青丸肝牛

黃清心丸痘煩躁主之身熱而倍能食唇紅頰赤大小便

秘脇下汗者此風熱也宣風散主之痘發熱已上諸熱久

而不去內外感發則所蘊瘡疹之毒亦能乘間而出矣

疹子只怕不能得出若出盡則便毒解故治疹子者

發熱之時當察時令寒暄以藥發之如時大寒以桂枝

葛根湯發之太熱以升麻葛根湯

俱初熱

合人參白虎湯

發之

痘渴

不寒不熱以荆防敗毒散發之

痘夾疹

如兼疫

癘之氣以人參敗毒散發之

痘初熱

如盡一劑不出再作

本湯發之外用胡荽酒

見形

以苧麻蘸酒遍身戛之務

令亟出如三四作更不出加腹中脹痛氣上喘促昏悶

譫妄者必死證也

瀉白消毒散

桑白皮

地骨皮

二味自採鮮者各三錢

牛蒡子

炒研 荆芥穗 各一錢五分 桔梗 甘草 各一錢 浮萍 曬乾二錢

右為麤末每服三五錢水一盞煎六分濾清服

加味金沸草散 旋復花 去梗 麻黃 去節水煮去沫曬乾 前胡 去蘆

各七錢 荆芥穗 一兩 甘草 炙 半夏 湯泡七次 赤芍藥 薑汁拌炒

各五錢 鼠粘子 炒 浮萍 各七錢

右為末每服三錢生薑二片薄荷葉三五片煎

防風解毒湯 如溫暖之時以此 防風 薄荷 荆芥

石膏 知母 桔梗 甘草 牛蒡子 連翹

辛涼之藥發之

木通 枳殼 淡竹葉

黃連解毒湯

如暄熱之時以此
辛寒之藥發之

防風 黃芩 黃連 荆芥穗 知母 石膏

黃檗 酒炒 梔子仁 大青 玄參 甘草 桔梗

木通

桂枝解毒湯

如大寒之時以此
辛溫熱之藥發之

桂枝 麻黃 酒炒 赤芍藥 防風 荆芥 羌活

甘草 桔梗 人參 川芎 牛蒡子 生薑

升麻解毒湯

如時煖時寒以此
辛平之藥發之

升麻 乾葛 荆芥穗 人參 柴胡 前胡

牛蒡子 桔梗 防風 羌活 赤芍藥 淡竹

葉 連翹 甘草

右方雖曰因時制宜亦不可拘泥如冬月亦有不宜麻桂而宜石膏者正當以脈證為主耳若株守而不知變通必有失不如用首二方之為妥當也

發熱六七日以後明是疹子却不見出此皮膚堅厚腠

理閉密又或為風寒襲之曾有吐利乃伏也急用托裏發表之劑麻黃湯調檉葉散發之外用胡荽酒見形麻刮之如一向未更衣者毒甚於裏伏而不出也以七物升麻丸解之發之解之再不出者死證也

麻黃湯

麻黃

去根節製過

升麻

牛蒡子

炒蟬殼

洗淨去足翅

甘草各一錢

煩渴加石膏末

四錢

右剉細加臘茶

葉一錢水一盞煎七分去查服

檉葉散

檉亦名西河柳亦名垂絲柳青茂時採葉曬

乾為末每服一二錢茅根煎湯調下

疹子初發熱時未見出現咳嗽百十聲不止止氣喘急
面浮目胞腫宜甘桔湯消毒散瀉白散三方合用內桑
白皮採鮮者多用熱盛煩渴加石膏未知母黃芩天花
粉

疹子發熱或自汗出或鼻衄者不須止之亦發散之義
汗則毒從汗散衄則毒從衄解但不可太過如汗太多
人參白虎湯痘渴合黃連解毒湯痘初躁或黃連湯主之

衄太多玄參地黃湯

失血

茅花湯主之

黃連湯

黃連

麥門冬

當歸

黃檗

黃芩

生

地黃

黃耆

水煎去查調敗蒲扇灰服之

茅花湯

茅花

真鬱金

生地黃

梔子仁

黃芩

水煎調百草霜服

疹子發熱吐利乃火邪內迫純是熱證不可作寒論

上焦多吐宜黃芩湯

利症泄

加茅根蘆根枇杷葉

下焦

多利宜黃芩湯送下香連丸

大科泄瀉

中焦吐利俱多宜

黃芩湯多加蘆根茅根煎調六一散熱痘初自利甚則

裏急後重而為滯下宜加味黃芩湯調六一散大抵

疹家吐利滯下宜於疹家求之不可作吐利滯下而治

加味黃芩湯黃連黃芩各一錢五分白芍藥三錢甘草七分

滑石末三錢水煎服若滑石不煎調服止於

一錢血痢加地榆二錢

銅壁山人黃芩湯黃芩黃連赤芍藥生地黃

木通枳殼甘草當歸稍人參

水煎去查調天水散服之 初加酒大黃微利之

疹出之時咽喉腫痛者乃毒火上熏而然勿作喉痺治法妄用鍼刺喉痺內作癭腫故宜決去惡血痘疹只是咽乾作痛宜甘桔湯加玄參牛蒡連翹或射干鼠粘子湯細細嚥之錢氏甘露飲子俱咽亦可外用十全散玉鎖匙點之

十全散 黃連 黃芩 黃檗 各一錢 苦參 孩兒茶

雄黃 各五分 硼砂 玄明粉 各三分 乳香 一分 片腦 少許

鹽時入

共為極細末每服五釐吹之

疹子渴喜飲水純是火邪肺焦胃乾心火內亢故也

初發熱渴者前發散藥中多加石膏天花粉或葛根麥

門冬散 疹子出見渴者人參白虎湯痘加天花粉麥

門冬渴甚者白虎湯合黃連解毒湯主之

葛根麥門冬散 葛根 麥門冬各一錢 石膏 升麻

赤芍藥 甘草 茯苓 人參各五分

右剉細加淡竹葉七片水一盞煎七分去渣溫服

白虎合解毒湯

石膏

研
篩末
四錢

知母

天花粉

黃芩

黃連

山梔仁

各一錢

生地黃

麥門冬

各三錢

入淡竹葉十片水二鍾煎一鍾更磨入犀角汁索湯
水則與之 覺胃熱渴甚宜以此方多與之胃清乃
止庶免牙疳之害直至疔成而後清胃涼血解毒往
往噬膚無及慈親仁人宜早為之所毋事始息

見形痘瘡貴三四次出謂出勻麻疹貴一齊湧出謂出

盡麻疹只要得出便輕減以火照之遍身如塗朱之狀此將出之狀出形細密與痘瘡密者相似但疹子隨出隨沒非若痘子之以漸長大也出形鮮紅與傷寒發癍相似但疹子粒粒成瘡非若癍之皮紅成片如蚊蚤之迹也 疹痘之色不可同論大抵痘子怕太紅皮嫩易破必生瘙癢疹子喜通紅疹發於心紅者火之正色也若色淡白者心血不足養血化癍湯主之色太紅殷或微紫者血熱也或出太甚者並宜大青湯主之黑者死

證也

養血化癍湯 當歸身 生地黃 紅花 蟬蛻

人參 各等分

右剉細水一盞生薑一片煎六分去渣溫服無時

大青湯 大青 玄參 生地黃 石膏 知母

木通 甘草 地骨皮 荊芥穗 各等分

右剉細水一盞淡竹葉十二片煎七分去渣溫服

疹子出沒常以六時為準假如子後出者午時即收午

後出者子時即收乃陽生陰成陰生陽成造化自然之數也凡此旋出旋收者輕若一出連綿三四日不收者乃陽毒太甚宜大青湯解之逡巡不出者乃風外束皮膚閉密也宜荆防敗毒散主之

夾疹

瘡疹非熱不出疹子欲出則遍身發熱或煩躁或頭眩或身拘急及既出則身便涼諸病悉解此一層疹子隨收矣如疹子既出熱甚不減此毒壅遏宜大青湯解其表便澀者以黃連解毒湯

痘煩躁

合白虎湯

發熱

解其裏

大便不通者四順清涼飲主之

發熱

加味地骨皮散 治疹出發熱不退飲食不進 地骨

皮

鮮者三錢

桑白皮

鮮者二錢

麥門冬

二錢

銀柴胡

赤芍

藥

乾葛

各一錢

甘草

五分

生犀角

五分

水煎調大小

無比散五七分

方見痘初熱

亦治喘急不止

凡疹子只要出得盡則毒邪解散正氣和平如拂拂發熱煩悶不寧如蛇在灰如蚓在塵之狀或嘔吐或注洩此毒邪壅遏尚未出盡煩熱者黃連解毒湯煩躁嘔洩

者柴胡橘皮湯並外用胡蔓酒

見形

以苧麻蘸酒遍身

屢之待疹子出盡則煩熱自去嘔洩自止矣

俱可用

大小無比散兼服

柴胡橘皮湯

柴胡

橘皮

黃芩

半夏

人參

白茯苓

各等分

右剉細加竹茹一團生薑三片水

一盞煎七分去渣溫服不拘時

疹子欲出未出之時宜早發散以解其毒則無餘災若不預解使之盡出以致毒畜於中或為壯熱日久枯痺

或成驚癇或為瀉痢或欬血喘促或作疳蠱而死此雖一時戾氣之染未有不由於人事之未盡者

收後疹子收後身有微熱者此虛熱也不須施治待氣血和暢自然退去若熱太甚或日久不減以柴胡麥門冬散甚則以黃連解毒湯煩躁合人參白虎湯痘渴與

前方相間服之如髮枯毛豎內消骨立漸漸羸瘦者柴胡四物湯主之疹子初起多瀉不妨惟愈後最忌重熱此不可不調治者蓋疹子發熱多至十一二日少亦

不下五七日熱久元氣虛矣加之疹出飲食不進而復重熱陰陽耗竭不死何待故再熱者必大補氣血可也余見忽以為常而死者屢矣

柴胡麥門冬散

柴胡

五分

龍膽草

三分

麥門冬

八分

甘草二分

人參

玄參

各五分

右剉細水煎服

柴胡四物湯

柴胡

人參

黃芩

當歸身

川芎

生地黃

白芍藥

地骨皮

知母

麥門冬

淡竹葉

右判細水一盞煎七分去查溫服不拘時

疹後熱不除忽作搐者不可與急驚風同論用導赤散

心加人參麥門冬送服安神丸

痘謔妄

小便清者可治短

少者不可治 凡疹後牙齦黑爛肉腐血出臭息衝人

者曰走馬疳馬鳴散主之

痘餘毒

若面頰浮腫環口青黑

頰漏齒脫唇崩鼻壞者死證也如唇口多瘡其聲啞啞

者曰狐惑以化蠱丸主之

痘餘毒

更煩躁昏悶失聲者死

證也

文蛤散 麻毒入胃牙肉黑爛出血走馬疔證

雄黃

錢五

五倍子

錢二

枯礬

五分

蠶退紙

一

燒存性

右細末米泔水洗淨以藥搽之

疹退之後微微咳嗽者此餘毒未盡也瀉白散合消毒散主之若咳甚氣喘連聲不住甚至飲食湯水俱噎出者此熱毒乘肺而然也宜門冬清肺湯加枇杷葉見血加茅根汁阿膠珠主之但見胸高如龜殼眉聳而喘血出口鼻擺手搖頭面色或青或赤或白而枯者皆不可

治也

門冬清肺湯

天門冬

去心

麥門冬

去心

知母

貝母

桔梗

款冬花

甘草

牛蒡子

杏仁

去皮
尖研

馬

兜苓

桑白皮

地骨皮

各等分

右剉細水一盞

煎七分去查食後溫服

疹出之時曾作泄利未經清解至疹退之後變為休息痢不問赤白裏急後重日夜無度此餘毒在大腸也以黃芩湯送下香連丸虛者加人參滑者加椿根白皮俱

於丸藥內加之勿入煎藥

疹子既收其毒不解邪火拂鬱渾身發熱晝夜不退髮
枯膚痒漸成疔瘡以清熱除疔丸主之若不早治以致
睡則揚睛口鼻氣冷手足厥逆微微瘰癧變為慢風不
救者多矣

清熱除疔丸 黃連 當歸各二錢 龍膽草 青皮 陳

皮

蘆薈

各一錢五分

川芎

乾蟾頭

燒各一錢

史君子

一錢

二分

共為末神麩糊為丸米湯下

如渾身壯熱未至羸瘦但多搐掣煩躁不寧此熱在心
脾二經也以當歸養血湯黃連安神丸間而服之

當歸養血湯 當歸 川芎 生地黄 麥門冬 去心

木通 甘草 淡竹葉 山梔仁 燈心 便秘

少加大黃

黃連安神丸

黃連 當歸 龍膽草 石菖蒲 茯神 各一錢
各二錢 各一錢 五

分全蠟七簡


共為細末湯浸蒸餅杵豬心血丸硃砂為衣燈草湯

下

幾見疹子收完之後出入動止如常忽然心腹絞痛而死者還是元氣虛弱曾受疫癘之氣外雖無病裏實虧損所以一發而死也謂之中惡間有用人參湯研蘇合香丸而甦之

禁忌疹家禁忌比痘家禁忌尤甚若悞食雞魚則終身

但遇天行之時又令重出也鹽醋食之令咳不止五辛食之令生驚熱所以通禁必待四十九日之後方無禁也 大熱未退不可與食與傷寒同 一發之時既表之後切戒風寒冷水瓜菓之類如一犯之則皮毛閉塞毒氣難泄遂變紫黑而死矣如極渴欲水只宜少與葱白以滋其渴耳必須使皮竅中常微汗潤澤可也又忌梅桃魚蜂蜜香鮮之物恐惹疔蟲上行



證治準繩卷八十八